



Վահան Թորոսեանց

Երկու հրդեհ

1

Բնակվում էի միստր Ռիզգի տանը: Մի. Ռիզգը մարդկային այն շատ բնական և հասարակ կատեգորիաներից էր, որ լինում են շատ հիմար, բայց չեն իմանում: Ինձ հետաքրքրողն էլ հենց այդ բնականն ու հասարակն էր: Մի. Ռիզգը կլոր, գեր, կարմիր էր, իսկ տիկին Ռիզգը՝ նիհար, երկարահասակ և խոշոր, ցցված ու երկար ատամներ ուներ:

Մի. Ռիզգը հարավցի էր, նրա հայրը բարձրաստիճան գինվորական էր եղել Միացյալ Նահանգների քաղաքացիական պատերազմում չարաչար կերպով պարտված հարավի բանակում: Ամբողջ ութ ամիս իմ հաճախակի պատահումներին՝ մի. Ռիզգը միայն մի նյութի մասին էր խոսում՝ իր հայրը, նրա քաջագործությունները պարտված բանակում, ապա և նրա պլանտացիաների անսահման տարածությունը և քաղաքացիական պատերազմով իր հոր կալվածատիրական տնտեսության ավերումը: Երբ մի. Ռիզգը հասնում էր իր պատմության վախճանին, նրա ձայնը դողում էր, անկեղծորեն ապրում էր մի ողբերգություն, որը հատուկ է այն մարդկանց, որոնք հարուստ ժառանգություն են երագում և սեփական աշխատանքը համարում են իրենց քնանրությանն անհարմար: Ռիզգի պատմության այդ վերջին մասն էր, որ ինձ չափազանց հետաքրքրում էր, որովհետև տիկին Ռիզգը լացակույմած աչքերով մոտենում էր իր ամուսնուն, բռնում էր նրա գլուխը և ուզում էր համբուրել նրան, բայց չէր հաջողում, շրթունքներն իրար չէին հասնում, մի. Ռիզգն էր, որ համբուրում էր իր կնոջ ատամները: Ես համառորեն ամեն առիթի նրանց պատմել էի՝ տալիս այդ

պատմությունը և, որ գլխավորն է, հետաքրքրվում էի այնպիսի մանրամասնություններով, որոնցով մի. Ռիզգը ոգևորվում էր, պատմում էր անընդհատ և մինչև անգամ նամակներ էր քրքրում, որպեսզի կարողանա ճշտել ամիսը, շաբաթը, օրը և ժամը:

Այնքան էր ոգևորվում մի. Ռիզգը, որ կուրանամ էր, չէր կարողանում տեսնել, որ ես պարզապես ձեռք էի առնում իրեն:

Ապա մի. Ռիզգը պատմում էր, թե իր հայրը ինչ կերակուրներ էր սիրում, որոնց մեջ աչքի էր դարձնում կաղամբով պատրաստված մի կերակուր, որի հոտը կաշում էր մինչև անգամ ուտողի գգեստներին:

Ի՞նչ ճաշակավոր մարդ է եղել,-ավելացնում էի ես անմիջապես:

Տիկին Ռիզգը գլուխը թեքում էր ուսի վրա, խոր բավականությամբ նայում էր իր ամուսնուն ես ոչ մի խոսքի համար այնքան չեմ զղջացել, որքան դրա համար: Դա պատճառ եղավ, որ շաբաթը երեք անգամ տիկին Ռիզգն ինձ համար եփի կաղամբով կերակուր: Մի. Ռիզգը միշտ գովաբանում էր տիկնոջը, որ այդքան փափկանկատ է թե՛ դեպի իր հայրը և թե՛ դեպի ինձ:

2

Մի առավոտ, նախաճաշի ժամանակ, մեր տան անկյանը կանգնեց մի ապրանքատար ավտոմոբիլ, զոգոաց, հեաց և լռեց: Մի. Ռիզգը, կարծելով, որ ավտոմոբիլը մեզ համար կանգնած կարող էր լինել, մոտեցավ լուսամատին և ներքև նայեց, մի պահ ապշած մնաց, հետո վերադարձավ սենյակ, սկսեց ապուշ-ապուշ նայել կնոջ վրա: Տիկին Ռիզգը, որ առհասարակ ուշի-ուշով հետևում էր իր ամուսնու բոլոր շարժումներին, նրանց մեջ միշտ հոգեբանական երևույթներ գտնելու հույսով, փոխադարձ սկսեց նայել: Ես, որ նրանց շարժումների մեջ առհասարակ միայն մարդակազմական երևույթներ էի տեսնում, այս անգամ մի. Ռիզգի աչքերում «տեսա» ինչ-որ հոգեբանություն: Ես էլ սկսեցի նայել: Սատանան... արտասանեց մր. Ռիզգը և նստեց աթոռին:

Ի՞նչ պատահեց, հարցրեց տիկին Ռիզդը և վազելով ամուսնու մոտ՝ ձեռքը դրեց ուսերին և աստամները վագրի նման ցցեց նրա նայվածքի մեջ:

Ես վազեցի դեպի լուսամուտը, նախ գլխի չընկա, բայց երբ տիկին Ռիզդը ետևիցս վազեց, գիտեց և «ահ» բղավելով՝ սկսեց լաց լինել, ես հասկացա:

Ապրանքատար ավտոմոբիլով եկել էր մի նեգր ընտանիք և կահ-կարասիքը տեղափոխում էր ներս. ուրեմն մեզ հարևան է դառնալու մի սևամորթ ընտանիք, որը մահացու կերպով խոցում էր հարավի ամերիկյան արիստոկրատների սիրտը:

Երբ մր. Ռիզդը տեսավ, որ տիկինը բոլորովին գունատվեց վազեց պահարանը, կաթիլներ հասցրեց և նրան հանգստացնելու համար հարեց.

Անպայման հասցեն սխալ է, անպայման մի աղետավոր թյուրիմացություն կա:

Տիկին Ռիզդը հավատալով իր ամուսնու ամեն մի արտասանության, լինել դա խոսք կամ մլավյուն, անմիջապես հանգստացավ:

Ես կգնամ ճիշտ հիմա և կպարզեմ թյուրիմացությունը, ասաց մր. Ռիզդը և անմիջապես հեռացավ առանց նախաճաշի սուրճը խմելու:

Դուք կարծո՞ւմ եք, որ այս թաղում թույլ կտրվի սևամորթներին ապրելու, հարցրեց ինձ տիկին Ռիզդն իր ամուսնու հեռանալուց հետո:

Առաջին անգամն է, որ այդպիսի բան եմ լսում,– պատասխանեցի, – ամերիկյան սահմանադրական օրենքում գույների հարց չկա, որքան ես գիտեմ:

Որովհետև ես չէի ապրել սևամորթների ստրկության համար պատերազմ հայտարարող և այդ պատերազմում պարտված, ջախջախված հարավի նահանգներում, ինձ շատ տարօրինակ թվաց պանսիոնի համար վճարած իմ փողով մասամբ ապրող այս արիստոկրատների հոգեբանությունը:

Բայց ինչո՞ւ համար, տիկին, դուք այդպես...

Տիկին Ռիզզը շթողեց, որ խոսքս շարունակեն, ավելի քաղաքավարի համարեց ինձ չլսելու անքաղաքավարությունը, քան ինձ կոպիտ պատասխանելու անքաղաքավարությունը և հեռացավ:

Քիչ անց՝ մր. Ռիզզը ներս մտավ բոլորովին գունաթափ:

Տիկին Ռիզզն անմիջապես վազեց ներս:

Դժբախտաբար, հասցեի սխալ չկա, բայց հիմա գնում եմ փաստաբանի մոտ. այսօր լեթ կվերջացնեն այս զգվեջի հարցը, չեմ թույլ տա, որ մի գիշեր անգամ քնեն նրանք այս տանը իբրև մեր հարևաններ:

Ես և մր. Ռիզզը միասին դուրս եկանք տնից, ես գնացի աշխատանքի, իսկ մր. Ռիզզը՝ փաստաբանի մոտ:

Երեկոյան, երբ տուն վերադարձա, հարցը վերջնականապես լուծումն էր գտել - ոչ մի օրենք չէր կարող սևամորթի ընտանիքին դուրս հանել սեփական բնակարանից:

Ես չցանկացա ոչ մի խոսք ասել, թողեցի նրանց անսահման սգի մեջ և հեռացա իմ սենյակը ու սկսեցի կարդալ Մառլոյի «Դոկտոր Ֆաուստուս»-ը:

Այդ օրից վերջ դգտավ իմ հետաքրքրությունը դեպի մր և տիկին Ռիզզը, որովհետև նրանց խոսակցությունը դարձավ անհանդուրժելի ինձ համար, միայն նախաճաշում և ընթրում էի նրանց հետ՝ առանց իմ կողմից խոսակցություն բանալու, իսկ իրենց խոսակցությունը դառնում էր այն «սարսափելի ընտանիքի» շուրջը, որ ապրում էր «հարավ տոկրատների իբրև հարևան»:

Իմ հայրը չկռվեց, որ սևամորթն իր որդու հարևանը դառնա, միշտ կրկնում էր մր. Ռիզզը:

Բայց մի օր էլ համբերությանս բաժակը լցվեց, և պատասխանեցի.

Մր. Ռիզզ, ձեր հայրը, այո, չկռվեց, որպեսզի սևամորթը ձեր հարևանը դառնա, բայց նա պարտվեց, որպեսզի սևամորթը ձեր հարևանը դառնա:

Զգվեի սրախոսություն, գոռաց մր. Ռիզգը և հեռացավ սեղանից:

Ես ընթրեցի, քաշվեցի իմ սենյակը և, այդ կոպտության ի պատասխան, որոշեցի ֆինանսական կրիզիս առաջացնել մր. Ռիզգի տանը: Առավոտյան նախաճաշի չգնացի, Երեկոյան դուրսն ընթրեցի: Մյուս առավոտը մր. Ռիզգը ժպտալով մտավ սենյակս և ասաց.

Տիկինը կարծում է, որ ես ձեզ հետ կոպիտ եմ վարվել. եթե այդպես է, ներեցեք:

Տիկինը ճիշտ է կարծում, բայց ներում եմ, պատասխանեցի:

Ուրեմն այսօր նախաճաշի կգա՞ք, հարցրեք մր. Ռիզգը:

Ոչ, պատասխանեցի, թժիշկը պատվիրեց ինձ արևելյան կերակուրներ ուտել, և ես քավում եմ, որ ստիպված եմ հրաժարվել ձեր ծառայություններից: Մր. Ռիզգը հեռացավ տխուր:

3

Մի քանի օր հետո, երեկոյան, երբ տուն էի գալիս, իմ դռան առաջ կանգնած էր մեր սևամորթ հարևանը: Կիսալուսի մեջ նրա աչքերը փայլում էին՝ ինչպես վառվող լուցկին մթնում, շրթունքները կախ, հաստ և կարմիր, ատամներն սպիտակ՝ ինչպես կատարների ձյունը, իսկ սև մորթն ինձ ներշնչեք ազնվություն: Ես կանգ առա, նա երեսը շուռ տվեց, որպեսզի ինձ չմատնի չբարևելու անհարմարության, բայց ես՝

Բարև ձեզ, ասացի:

Նա անմիջապես շուռ եկավ, մի պահ լռեց և հաստատ համոզվելով, որ իրեն էի բարևում, դողդողալով պատասխանեց.

Բարև ձեզ:

-- ինչպե՞ս եք, հարց տվի:

-- Շատ լավ, վրա բերեց սևամորթը անմիջապես, սևամորթներին հատուկ անգլերեն շեշտավորությամբ՝ Դո՛ւք ինչպես եք:

-- Ինչպե՞ս է ձեր նոր բնակարանը, հարցրի:

Սևամորթը, առանց իմ հարցմանը պատասխանելու, շարունակեց.

-- Դուք երևի հարավից չեք: Ոչ հարավից, և ոչ էլ հյուսիսից պատասխանեցի, ես արևելքից եմ և նախ և առաջ մարդ եմ:

Օ՛ր... եղավ սևամորթի պատասխանը:

Ջեզ ոչ մի վտանգ չի՞ սպառնում արդյոք բնակարանից գրկվելու, հարցրի:

Ոչ մի վտանգ օրենքով, բայց տիկին Ռիզզը օրենքից հզոր է երևում, պատասխանեց սևամորթը:

Ինչպե՞ս:

Մի հարցնեք. երբ դուք առաջին իմ երեխաները նրանց դիպչում են «հեռացե՛ք, հեռացե՛ք, կեղտոտում եք իմ շորերը» բղավում է և անհանդուրժելի կերպարանք է ցույց տալիս:

Չպատասխանեցի:

Բարի գիշեր, մր. Բուկեր, ասացի սևամորթին և հեռացա:

Լուսամուտից ես տեսա մր. Բուկերին, որ իր կանգնած. տեղում գամված մնացել էր. նրա շրթունքները դողում էին, աչքերը սիրով և գուրգուրանքով լցված, երևում էր, որ նա խորապես զգացված էր իմ վերաբերմունքից: Մի պահ դիտելուց հետո՝ ես զգացի, շոշափման պես զգացի, որ նա ցանկանում էր ինձ գրկել և համբուրել:

Անցավ մի քանի օր, ես հանդիպեցի տիկին Բուկերին իր երկու գավակներով: Բարևեցի տիկին Բուկերին, իբր թե ուրիշ անգամ պատահած լինեի նրան:

Բարև ձեզ, պատասխանեց տիկին Բուկերը լայն բավականությամբ և առանց շփոթվելու, մինչդեռ նրա երկու սև փոքրիկները, փաթաթվելով մոր սրունքներին, գլուխները կախ, բայց սկեռուն աչքերով նայում էին ինձ՝ ինչպես ձմերուկի սև կետեր, նայում էին այն սպիտակ մարդուն, ու ժպիտով բարևում էր իրենց մորը: Մոտեցա մեկին, փաղաքշանքով կմշտեցի նրա սև, ուռած և փափուկ թշերը, ապա դառնալով տիկին Բուկերին՝

Ինչ առողջ եմ, ասացի:

Շնորհակալ եմ, պատասխանեց տիկին Բուկերը, և առաջին անգամ ընթոնեցի այդ բառի իսկական նշանակությունը, մի բառ, որ Ամերիկայում ամեն մարդ ամեն քայլափոխի, ամեն առիթի, ամեն մի բանի համար գործածում է:

4

Ես շուտով ծանոթացա նրանց կյանքի պատմության. մր. Բուկերի հայրն ստրուկ է եղել, ինքն ստրուկ է ծնվել, քաղաքացիական պատերազմով ազատվել է: Մր. Բուկերը 20 տարեկան կորցրել է իր հորը, իսկ ինքը գինետան մեջ կեղտեր մաքրելով դառել է գինետան տեր, փող է ավելացրել, ապա ծախել է գինետունը, տեղափոխվել մեր քաղաքը, մեր հարևան տունն է գնել և զբաղվում է վերարկուների առևտրով:

Մի օր փոքրիկ Բուկերներից մեկին բերի իմ սենյակը, շոկոլադ տվի և ուղարկեցի տուն: Երբ դրսի դուռը փակեցի և երկու քայլ միջանցքն ուղեցի անցնել, մր. Ռիզզը գցվեց իմ դեմը, ցատումից շվարած՝ ուզում էր մի բան ասել, բայց կակազում էր, մինչդեռ տիկին Ռիզզը, ճաշարանի շենքին կանգնած, ատամներն սպառնագին գցած, դաժանորեն նայում էր ինձ:

Դուք... դուք... դուք անպատվում եք մեր տունը, հագիվ պատասխանեց մր. Ռիզզը:

Ինչ է պատահել, հարցրի անտաբեբերությամբ:

Տիկին Ռիզզը խելագարի պես ճշաց, այնքան գայրացավ նա իմ պատասխանից, որ ուզում էր դռան փայտը կծել:

Դուք անպատվում եք մեզ գարշելի սևամորթի երեխան բերելել իմ տունը, բղավեց մր. Ռիզզը:

Իմ սենյակն եմ բերել, պատասխանեցի և ուզեցի հեռանալ երբ մր. Ռիզզն իմ թևից, բռնեց անսահման զսպոգությամբ:

--Դուք պետք է հեռանաք իմ տնից,-- շարունակեց նա:

Լավ, թող ամիսը վերջանա, կգնամ,-- պատասխանեցի և մտա սենյակս:

5

Դեռ ամիսը չէր վերջացել: Մի երեկո, մամը 10-ի մոտ տուն եկա, մեր փողոցը շուտ չեկած՝ տեսա, որ մեր տան անկյանը ահավոր բազմություն էր հավաքվել, ոստիկանները կանգնած էին և կարգ էին պահպանում: Շտապեցի: Սևամորթ Բուկերի բնակարանն այրվում էր, հրշեջները քարուքանդ էին անում շենքը, տունն ամբողջ ճարճատում էր, բոցավառվում և փլչում, ջրի մեքենան անդադար աշխատում էր: Ջրի ահավոր մի հոսանք, իբրև անդիմադրելի մի պատմեշ, կանգնել էր մր. Ռիզզի և սևամորթի տան մեջտեղում և պաշտպանում էր Ռիզզի բնակարանը:

Մր. Բուկերը, իր տիկնոջ և զավակների հետ, կանգնած էր բոցավառվող տան դիմաց: Բոլորն էլ գիտում էին հրդեհը ահարկու և ահաբեկված աչքերով: Վազեցի նրանց մոտ: Տիկին Բուկերն արցունքոտ աչքերով գրկեց ինձ և ասաց.

Դեռ չէինք ապահովագրել տունը*

Մր. Բուկերի կարմիր շրթունքները դողում էին. նրա նայվածքի մեջ մի ամբողջ փոթորկալից ծովի մռայլություն կար:

Մր. Ռիզզն է այրել իմ տունը, մր. Ռիզզն է կրակ գցել իմ բնակարանը, պետք է օրենքը պատժի նրան, եթե ոչ՝ ես անձամբ կպատժեմ նրան:

Ոստիկանը մոտեցավ մր. Բուկերին, կանգնեց նրա դիմաց՝ ինչպես մի դաժան կոշմար և ցածր ու հատու շեշտով ասաց.

Գիտե՞ք, որ սպառնալիքը քրեական հանցանք է համարվում:

Գիտեմ, ամեն բան գիտեմ, գիտեմ նաև, որ օրենքը միայն սև գույնն է տեսնում, պատասխանեց մր. Բուկերը:

Սո՞ւս,– սաստեց ոստիկանը, երեսը դարձրեց և մեխվեց իր տեղում:

Ես վազեցի իմ տունը, արագ բաց արի ճաշարանի դուռը, ուր մի ամսից ի վեր ոտ չէի դրել: Մր. Ռիզգը և տիկին Ռիզգը ահաբեկված ցատկեցին, սուրճի բաժակները թափվեցին: Ես մի պահ կանգ առա, ապա երկու քայլ մոտեցա, հայացքս հատեցի հարավի այդ երկու արխատուկրատների աչքերին և համոզվեցի, որ հրդեհը նրանք էին գցել:

Սրիկանե՞ր,– գոռացի,– դուք անասուններ, գազաններ եք:

Նրանք չպատասխանեցին: Մոտեցա պատուհանին, տեսա մր. Բուկերին իր կնոջով և երկու երեխաներով,, որոնք լուսավորված էին իրենց բնակարանի հրդեհի բոցերով, կուչ եկած, երեխաները լաց էին չինում իրենց մոր հետ, իսկ Բուկերը հատել էր իր աչքերը բոցավառվող բնակարանի դժոխային լեզուներին:

Մր. Բուկերի բնակարանում, բացի այրվող նյութերից, այրվում էր նաև ամերիկյան սահմանադրական օրենքը, և ես լսում էի նեգրի այրվող բնակարանի և կեղծամիտ օրենքի ճարճատյունները:

1928 թ.